

U K A Z

Na osnovu člana 75 tačka 4 Ustave NRBiH, a u vezi člana 5 tačka 12 Zakona o Prezidiјumu Narodne skupštine NRBiH, Prezidiјum Narodne skupštine NRBiH proglašuje Zakon o Univerzitetu u Sarajevu, koji je donijela Narodna skupština NRBiH, a koji glasi:

Z A K O N

o Univerzitetu u Sarajevu

I Opšte odredbe

Član 1

Osniva se Univerzitet u Sarajevu kao najviša nastavno-vaspitna i naučna državna ustanova u Narodnoj Republici Bosni i Hercegovini.

Član 2

Osnovni zadaci Univerziteta su:

- 1/ da izgrađuje visoko kvalifikovane stručnjake u raznim granama nauke i tehnike;
- 2/ da radi naučno-istraživački i da učestvuje u naučnom rješavanju zadataka kulturne, privredne i tehničke izgradnje zemlje;
- 3/ da izgrađuje i razvija napredne naučne misli i naučnost u nastavi i teoretskom radu;
- 4/ da vaspitava i obrazuje studente na osnovama nauke marksizma-lenjinizma i da razvija ljubav i odanost prema socijalističkoj otadžbini Federativnoj Narodnoj Republici Jugoslaviji kao i prema djelu socijalizma uopšte;
- 5/ da radi na popularizaciji naučnih i tehničkih znanja.

Član 3

Univerzitet stoji pod opštim rukovođstvom Komiteta za Univerzitet, visoke škole i naučne ustanove.

Član 4

Univerzitet se sastoji od fakulteta.

U sastav Univerziteta ulaze svi fakulteti osim onih za koje Vlada uredbom izričito odredi da su samostalni fakulteti.

Član 5

Univerzitet ima svoj predračun prihoda i rashoda koji ulazi u sastav predračuna Komiteta za Univerzitet, visoke škole i naučne ustanove.

Naredbođavac za izvršenje predračuna je rektor.

Član 6

Vlada uredbama osniva fakultete i propisuje njihovu organizaciju i rad.

Fakulteti se organizuju prema pojedinim osnovnim naučnim granama.



Na jednom fakultetu može biti grupisano i više međusobno bliskih naučnih grana. Ove grane mogu biti organizovane u pojedine odsjeke odnosno pojedine grupe.

Član 7

Za ostvarenje svojih zadataka Univerzitet i fakulteti imaju svoje pomoćne nastavne i naučne ustanove i upravljaju državnim imanjima koja im budu dodijeljena.

Ove ustanove osniva Univerzitet odnosno pojedini fakulteti po odobrenju Komiteta za Univerzitet, visoke škole i naučne ustanove.

Član 8

Univerzitet je pravno lice.

Fakultet ima svojstvo pravnog lica ako je samostalan ili ako mu Vlada to svojstvo izričito uredbom prizna.

II Organi Univerziteta i fakulteta

Član 9

Organi Univerziteta su: univerzitetska skupština, univerzitetski savjet i rektor.

Organi fakulteta su: fakultetski savjet i dekan.

Član 10

Univerzitetsku skupštinu sačinjavaju svi redovni i vanredni profesori, docenti, predavači i honorarni nastavnici pojedinih fakulteta Univerziteta.

Univerzitetska skupština može rješavati ako je prisutno najmanje dvije trećine članova. Odluke se donose većinom glasova prisutnih članova.

Radom univerzitetske skupštine rukovodi pretsjedništvo koje se bira na svakom sastanku skupštine.

Član 11

Univerzitetska skupština se saziva na redovni sastanak krajem svake školske godine. Po potrebi skupština se može sazivati i na vanredni sastanak.

Skupštinu saziva rektor.

Na obrazloženi zahtjev univerzitetskog savjeta ili trećine članova skupštine, koji predlažu i dnevni red sastanka, rektor je dužan sazvati univerzitetsku skupštinu na vanredni sastanak najdalje 15 dana od dana prijema zahtjeva.

Član 12

Univerzitetska skupština vrši ove poslove:

- 1/ bira rektora i prorektora;
- 2/ raspravlja o rektorovom godišnjem izvještaju;
- 3/ raspravlja načelna pitanja o nastavnom i naučnom radu Univerziteta i o tome podnosi predloge Komitetu za Univerzitet, visoke škole i naučne ustanove.

Član 13

Univerzitetski savjet sačinjavaju: rektor kao pretsjednik, prorektor, dekani i prodekani svih fakulteta Univerziteta.

Univerzitetski savjet može rješavati ako je prisutno najmanje dvije trećine članova. Odluke se donose većinom glasova prisutnih članova.

Član 14

Univerzitetski savjet rješava sva važnija opšta i zajednička pitanja Univerziteta a naročito:

- 1/ raspravlja o planovima rada fakulteta i dostavlja ih na odobrenje Komitetu za Univerzitet, visoke škole i naučne ustanove;
- 2/ raspravlja o svim pitanjima i predlozima koje mu upućuju pojedini fakulteti i daje svoje mišljenje i predloge o njima organima nadležnim za rješavanje;
- 3/ donosi odluke o oskrivanju nastavnih i naučnih ustanova Univerziteta i podnosi ih na odobrenje Komitetu za Univerzitet, visoke škole i naučne ustanove;
- 4/ bira komisiju pred kojom će se braniti doktorska disertacija;
- 5/ podnosi predloge o dodjeljivanju titule počasnog doktora.

Član 15

Titulu počasnog doktora mogu dodijeliti samo redovni i vanredni profesori većinom glasova na svome sastanku kome prisustvuje najmanje dvije trećine profesora.

Član 16

Univerzitetski savjet može, prema potrebi, obrazovati naročite komisije za vođenje određenih poslova kao i naročite savjete za proučavanje pojedinih pitanja.

Član 17

Rektor predstavlja Univerzitet, zastupa ga kao pravno lice i upravlja njegovim poslovima.

Rektoru pomaže u vršenju poslova prorektor. Prorektor zamjenjuje rektora kad je odsutan.

Rektor i prorektor biraju se na dvije godine. Rektor se bira između redovnih, a prorektor između redovnih i vanrednih profesora.

Izbor rektora i prorektora potvrđuje Predsjednik Vlade.

Član 18

Za svoj rad rektor i prorektor odgovaraju univerzitetskoj skupštini i Komitetu za Univerzitet, visoke škole i naučne ustanove.

Član 19

Fakultetski savjet sačinjavaju: dekan kao predsjednik, prodekan, redovni i vanredni profesori, docenti, predavači i honorarni nastavnici.

Član 20

Fakultetski savjet rješava sva važnija pitanja fakulteta.

Fakultetski savjet može rješavati ako je prisutno najmanje dvije trećine članova. Odluke se donose većinom glasova prisutnih članova.

Član 21

Dekan rukovodi cjelokupnim radom fakulteta, predstavlja ga i zastupa. Dekanu pomaže u vršenju poslova prodekan. Prodekan zamjenjuje dekana kad je odsutan.



Dekana i prodekana bira fakultetski savjet na kraju svake školske godine. Dekan se bira između redovnih i vanrednih profesora, a prodekan između redovnih i vanrednih profesora i docenata.

Izbor dekana i prodekana potvrđuje Komitet za Univerzitet, visoke škole i naučne ustanove.

Na većim fakultetima ili na fakultetima u čijem su sastavu jače diferencirani odsjeci mogu biti dva prodekana.

Član 22

Za svoj rad dekan i prodekan odgovaraju fakultetskom savjetu, rektoru i Komitetu za Univerzitet, visoke škole i naučne ustanove.

III. Studenti

Član 23

Na Univerzitet se mogu upisati lica koja su završila srednju školu i položila završni ispit kao i lica koja na to imaju pravo po posebnim propisima.

Strani državljani moraju imati odobrenje za upis Ministarstva za nauku i kulturu Vlade FNRJ.

Član 24

Studenti mogu biti redovni i vanredni.

Redovni studenti dužni su da pohađaju predavanja i vježbe i da vrše propisanu praksu.

Kao vanredni studenti mogu se upisati lica koja zbog zaposlenosti u državnoj ili zadružnoj službi ili u službi društvenih organizacija nisu u mogućnosti da pohađaju predavanja i vježbe i da učestvuju u drugom školskom radu.

Član 25

Studenti imaju pravo da osnivaju svoje stručne, kulturne i druge organizacije preko kojih mogu iznositi svoje mišljenje i predloge po pitanjima koja se tiču rada na Univerzitetu i položaja studenata.

IV Administracija

Član 26

Administrativno-tehničke i materijalne poslove Univerziteta odnosno pojedinog fakulteta obavlja sekretarijat Univerziteta odnosno sekretarijat fakulteta.

Poslovima sekretarijata rukovodi sekretar Univerziteta koji je neposredno podređen rektoru, odnosno sekretar fakulteta koji je neposredno podređen dekantu.

V Prelazne i završne odredbe

Član 27

Danom stupanja na snagu ovog zakona prestaje važnost Zakona o Pravnom fakultetu, Zakona o Medicinskom fakultetu, Zakona o izmjenama Zakona o Medicinskom fakultetu i Zakona o Poljoprivredno-šumarskom fakultetu.



Vlada će po stupanju na snagu ovog zakona donijeti posebne uredbe o postojećem Pravnom fakultetu, Medicinskom fakultetu i Poljoprivredno-šumarskom fakultetu.

Član 28

Propise o nastavi i nastavnicima, bliže propise o studentima kao i propise za izvršenje ovog zakona donosiće Vlada.

Član 29

Ovaj zakon stupa na snagu danom objavljivanja u "Službenom listu Narodne Republike Bosne i Hercegovine".

U. br. 30 /49

11. septembra 1949 g.

Sarajevo

PREZIDIJUM NARODNE SKUPŠTINE
NARODNE REPUBLIKE BOSNE I HERCEGOVINE

Sekretar,

G. Novaković
/Grujo Novaković/



Predsjednik,

B. Segrt
/Vlado Segrt/